

Kulturikkut ingerlatsineq sunngiffimmilu sammisassaqaqtitsineq pillugit Inatsisartut inatsisaata allanngortinneqarnissaa siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsimmi piumasaqaataasut appartinnerisigut kommunini inoqarfiit ukiut tamarmik kulturikkut ingerlatsineq sunngiffimmilu sammisassaqaqtitsineq pilersarusiortalissavaat.

(Inatsisartunut Ilaasortaq Mimi Karlsen, Inuit Ataqatigiit)

Siulittaasoq Qujanaq.

Siullermik siunnersuuteqaqtumut Inuit ataqatigiineersumut Mimi Karlsen-imut qujarusuppugut, inuunitsinni ulluinnarnilu ilinniarnikkut siuarsarnitsinni pingaarutilinnik saqqummiussaqaqmat.

Sunngiffimmi sammisaqaqtitsinerit, ulluklut unnuklut ilinniarnermut periarfissanut inatsisip, kulturimullu tunngasunik ingerlatsinerit inuiaqatigiinnut pingaaruteqarluinnartuupput, Inuiaqatigiinnut tamanut meeqqaniit inuusuttunut, aammalu inersimasunut utoqqarnullu, pisariaqaqtitsisunut tamanut ammasuunissaat Naleqqamiit pingaartitaraarput.

Inuiaqatigiit sungiusimasarput ataatsimuualaarneq, kultur-itsinnik aallaaveqaqtumik aamma siulitsinnik kingornussimasarput atorluarlugu ataatsimoorluni assigiingittunik ilinniagaqarsinnaaneq, assasornermiuppat, saaqqusiornermiuppat, oqaatsinik tunngasuteqarpat imalu nipilersorneruppat,

kulturimik ingerlatsinerit inuiaqatigiinni ataatsimooritsinnik nukittorsaataapput.

Kisianni pissutsit piviusut oqaatigisariaqarpavut, tamannalu aamma Naleqqamiit toqquartornata qaqilertuartarpagut.

Massaklut nunatsinni inatsisit malillugit minnerpaamik peqataasussanut killiliussat annertuallaarmata.

Nunaqarfiit Illoqarfiillu mikinerit eqqarsaatigalugit inatsit atuuttut naapertuutinnigivipput tulluarsarneqarnissaallu pisariaqarluni.

Allaqqasutmalillugit peqataasussat minnerpaamik arfineq-pingasut, aqqaneq-marluk imaluunniit killiliussat amerlanerusut piumasaqaataagaangata,

Tamanna isumaqarpoq nunaqarfinni inukittuni najugaqarsfiusuni amerlasuuni ingerlatsisoqarsinnaanera mattunneqartartoq.



Ersarissarlugu periarfissaagaluit inuiaat atorluarsinnaasaat mattunneqartarput.

Tamanna massakut isigalugu sinerissami avinngarusimasuniittunut inoqarfinnut minnerusunut eqqornerluivoq, pissutsit taamaattut aamma peqqutaaqataasinnaapput.

Angallatitta kisarsuit kalitaat oqimaatsut, allat piumasaqaataat, immitsinnut aallaavigaluta

Nalimmassarnissai piffissanngorsimasoq takutippaa.

Ukiuni makkunani takusinnaalikkagut, najugaqarfiit avinngarusimasuniittut katataanerat, naak aalisartoqarfissuugamik aningaasanik isaatitsiviugaluarlutik siuariartorunnaarlutik katataanerat.

Inuttut qaammarsarneqarani siuarsarneqannginnermi kingunipilui ersermata.

Inuit sumi najugaqarnerat apeqqutaalluni assigiinngitsumik periarfissaqartinneqalerput.

Tamanna pissusissamisoortuunanilu eqqortuusinnaangilaq.

Naleqqamiit naleqartitatsinni ersarippoq, sineriak nunarpullumi tamaat assigiimmik ineriartortikkusukkipput.

Qineqqusaarnitsinni ersarissumik ilanngullugu oqaatiginikuuarput aamma pimooruppagut anguniakkavut qineqqusaarutivullu.

Inatsisartuniit nunarput tamakkerlugu ineriartortinneqarusuppat,

Naleqqamiit tunuarsimaarata pimoorussilluta oqaloqataassaagut.

Naak ilaanni pissutsit piviusut qaqileraangatsigit naqittaanniarneqarluta ajortunngortinniarneqarluta pisaraluaatigut,

Taamak inatsisartoqatigut siunnerfeqarpata aaliangertoqarusuppallu

Malittarisassat nunatsinni illoqarfinni nunaqarfinnilu tamani atorneqarsinnaasunik pilersitseqataanissarput oqalliseqataanissarpullu ammaffigaarput.

Illoqarfinnut annernut naleqqussakkat kisiisa pinnagit!

Taamaattumik siunnersuummi siunertarineqartoq Naleqqamiit tapersorsorparput.

Naleqqamiit isumaqarpugut alloriartariaqalertugut.

Taamaattumik naalackersuisut siunnersuutaat sunngiffimmi ilinniartitsinerni assigiinngitsuni tamani periarfissap eqqartorluarneqarnissaanut inoqarfiit mikinerit eqqarsaatigalugit

Nalimmassarneqarnissaanut tapersiivugut,

Unnukkut sunngiffimmi atuarnermi ingerlatsisarnissamut, nipilersornermik ilinniartitsinissamut, assasornermut, saaqqusiornermut, motoorilerinermut, mersornermut, eqqumiitsuliornermut, oqaatsinik ilinniartitsinermut, arlaannulluunniit assigiingitsunut najukkani pisariaqartinneqartunut misissuisoqarnissaa taperserparput.

Inoqarfinni avinngarusimasuniittuni imaluunniit illoqarfinni inukinnerusuniittut eqqarsaatigalugit killissarititaasut nalimmassarneqarnissaanut periarfissap

Eqqartorneqarnissaanut peqataassaagut.

Eqqaamassavarput nunatsinni inuiaat ilisimatuussutsikkut ineriartorsinnaanerit assigiimmik tamani pisinnaanissaa ammatinneqartussaammat.

Ineriartortitsineq tassaavoq inuit ulluinnarni periarfissaat, ataatsimoornissaat inuiaqatigiinnilu peqataatinneqarnissaat.

Nunaqarfiit illoqarfiillumi inuummarissut nukittuut imminnut nammattut

Pilersikkusukkutsigit, taava najukkani ingerlatsinissat ajornarnerulersissanngilagut.

Inuuniarnermut oqilisaasariaqarpugut periarfissanillu piorsaanissamut periarfissiilluta.

Neriuppunga nunatsinni inatsisartoqatigut pissutsinut naapertuunnerusumik eqqaannerusumillu aaqqissuussinissamut ammasuussasut.

Piffinni inuiaat nukittorsarneqarsinnaanerit ammaanneqassaaq, periarfissat amerlanerit piffinni minnerusuni ammaanneqassapput, assersutigalugu Nunaqarfinni inukinnerusuni, illoqarfinnilu inukinnerusuni.

Ataatsimoornissamut inunnik naapitsinissamut periarfissat ammaanneqassapput.

Minnerungittumik meeqqat inuusuttullu sunngiffimmini periarfissanik ammaanneqarnissaat periarfissatsialattut isigivarput taamaattumik qaqilerisoqarnera qujarupparput, sulilu allornerulaarsinnaanerput uanilu piffimmi anguniarusullutigu.

Taamak oqaaseqarluta sammisap imm.175 siullermeerneqarnerani,

Ataatsimiititsitaliamut

Kultur-eqarnermut, ilinniartitaanermut, ilisimatusarnermut, ilageeqarnermut ataatsimiititsitaliamut ingerlateqqinneqarnissaa innersuupparput.

Qujanaq.